



FELCO
Federacion dels Ensenhaires
de Lengas e Cultura d'òc

Aquitàine, Auvergne, Ile de France, Languedoc, Limousin, Midi-Pyrénées, Provence-Alpes-Côte d'Azur, Rhône-Alpes

Butletín n°213
25/10/2006

Total Festum... Totala mobilizacion

La jorna dau Total Festum 21 d'octòbre a Montpelhièr s'es ben acabaa.

Mercés a totes los collègas de mantuna acadèmia que venguèron ajudar a l'estand FELCO /CREO Lengadòc aqueste dissandes.

Valia lo còp de l'i estre, per los rescontres qu'avèm pogut far, amb de mond qu'èran pas necessàriament de militants occitanistas encartats, (emai l'i foguesson ben representats, dins totas lors variantas, emai amb lo Felibritge) mas de gent dau luec que la question los interpèla en quauqu'endrech, e que poian parlar amb n'autres en occitan, amb un plaser vesible.

Aqueu contact amb la societat regionala, qu'aviam començat d'entreveire a Carcassona, o a Rodès per *l'Estivada*, es lo signe encoratjant que siam pas, o pas pus, solets dins nòstre ghetto.

Una prefiguracion de çò que serè Besièrs en març que ven ? Perqué pas ?

Nos chal aüra esperar que Totam Festum es una primiera manifestacion de la Region Lengadòc Rosselhon, e que d'autres seguirèn ; mas tre encuei, enregistram la volontat manifestaa per aquesta Region de menar una accion coerenta sobre las lengas occitana e catalana.

Esperam que prendrè lèu una fòrma concreta, a través per exemple de la convencion Region-Rectorat, qu'es aüra a se negociar despuèi pron temps.

La pausicion de la FELCO la conoissètz :

- la Region, coma las autras collectivitats localas es un partenari fundamentau per lo desenvolopament de l'ensenhament de l'occitan coma de las autras lengas regionalas, en sinèrgia amb l'accion de l'Estat ;
- d'aqueu ponch de vista, demandam a la Region, coma als elejuts nacionaus, de nos sosténer dins las revendicacions que fasèm montar vers lo ministèri, perfïn que faça enfin una plaça decenta a nòstra lenga dins l'ensenhament public. Es pas veraiament çò que fai dinqu'aüra, e chau doncas mantener la pression.

Perqué tot es pas reglat, e nos sobra d'òbra per far avançar tot aquò.

Conviam doncas las associacions achampaas dins la FELCO (los CREOs, l'AELOC, l'APLR), a se mobilizar e a se renfortir.

Pas solament perque la FELCO siam en primièra linha dins l'organizacion, amb d'autres, de Besièrs 2007, e qu'aquò demanda d'argent e de trabalh de preparacion.

Mas tanben perque lo trabalh de seguit dau terrenh qu'ensajam de bastir a de sens soncament s'es relaiat a la basa, dins nòstras associacions academias.

Breu, e per clavar, après Totau Festum, lo mot d'òrdre es Totala Mobilizacion.

Felip Martel, President de la FELCO

Rampèl AG de la FELCO : dissabte 25 / 11 / 2006
14 oras - Universitat Paul Valéry Montpellier

Total Festum dins la premsa : http://creo-mp.chez-alice.fr/actualite_creo.html

Se podètz completar aquela revista de premsa, serà plan, metrem totes los articles en linha, en particular lo n° especial de *la Gazeta*.